

### **Кондак 1**

Избранной от всех родов преблагословенной Деве похвальное приносим Ти пение, яко Мати сущи Бога. Земнородным явилася еси милосердая Матерь, страждущим подаючи отраду, болящим различными недугами исцеление и от наветов вражиих защиту, всем же молящимся Тебе скорое услышание. Темже в радости и умилении вопием Ти:

Радуйся, Радосте наша, избави нас от всякия нужды и печали.

### **Икос 1**

Архангелов и ангелов лики на небеси и человеков множество на земли славят Тя, Царицу всех и Богородицу, яко даровала еси нам велию радость и утешение: образ Твой святой, пред нимже благоговейно предстояще, умиленно Тебе зовем:

Радуйся от века предусмотренная Господом и Царем славы;

Радуйся, предочищенная чрез роды и роды праведников.

Радуйся, святейшая Дево, самим Богом избранная в Матерь Сыну Божию;

Радуйся, достойный плод безгрешных Твоих родителей Иоакима и Анны.

Радуйся, Невесте Божия, воспитанная в земном доме Царя Небесного;

Радуйся, обрадованная благовестием архангела Божия Гавриила.

Радуйся, возвеличенная паче всех жен рождением от Тебе Спасителя миру;

Радуйся, Радосте наша, избави нас от всякия нужды и печали.

### **Кондак 2**

Честные херувимы и славнейшие серафимы, окружающие вседержавный престол Пресвятыя Троицы, в благоговении пламенно взирают на Тя, яко в славе тамо предстоящи, моляся милосердому Богу за род христианский. Мы же zde на земли предстояще Твоей святей иконе, всем сердцем радуящиеся благоговейно взываем ко Всевышнему: Аллилуиа.

### **Икос 2**

Проразумеша духом Божиим апостоли Христовы, коль вожделенно будет для верующих начертание на дске святейшего лика Пречистой Девы Богоматери, избраша из среды себе божественного Луку, яко живописца предивна. И той, испроси Матернее от Тебе благословение, подкрепляемый постом и молитвою, написа первую икону Тебе Владычце, к ней же Сама рекла еси: «С Тобою будут благодать Моя и сила». Сего ради со умилением зовем Ти:

Радуйся, яко не токмо не возбранила, но Сама благоизволила еси, да изображен будет на дске лик Твой Пречистый;

Радуйся, яко восходя к небеси, начертание лика Твоего в залог любви Твоей нам оставила еси.

Радуйся, яко по отшествии Твоем на небо, образ Твой святой истинное утешение бысть всем верующим;

Радуйся, яко христиане вси стекахуся в Гефсиманию образу Твоему, яко живеи Ти сушеи, поклонитися.

Радуйся, яко взиравший тогда на образ Твой облегчение в скорбех душевных обретаху;

Радуйся, яко со слезами молившиися пред иконою Твоею исцеление в болезнех приимаху.

Радуйся, яко и ныне вси молящися пред Пречистым образом Твоим исполнение прошений приемлют;

Радуйся, Радосте наша, избави нас от всякия нужды и печали.

### **Кондак 3**

Сила благодатная, Тобою дарованная первописанной иконе Твоей, такожде проявися и в иных многих подобиях Ея, егда преданная чада Твоя моляху апостолов, да умножат им иконы Твоя, да вси имут их кийждо в дому своем, и радуяся и благоговея, прославляют Тя, святейшую Матерь всесильнаго Бога, вопиюще ему: Аллилуиа.

### **Икос 3**

Имущи безмерную любовь к богодарованным Ти чадам Божиим, благословила еси святых апостолов содеяти даже до тридесяти начертаний лика Твоего Пречистаго, на утешение и радость словесных овец стада святейшаго Сына Твоего. Темже вседушно благоговея, зовем Ти:

Радуйся, ангелами хвалимая и воспеваемая от серафимов;

Радуйся, яко Тобою вся вселенная радости и веселия исполняется.

Радуйся, яко иконы Твоя на молитвенное с Тобою общение нам даровала еси;

Радуйся, яко чрез них благодеяния различны миру всему источаеши.

Радуйся, яко силу Твою благодатную и сей иконе обильно пресуществовала еси;

Радуйся, яко облистая нас святою иконою Твоею, Сама невидимо среди нас пребываеши.

Радуйся, предстояще славней иконе Твоей, Самой Тебе истенней Матери Божией поклоняемся;

Радуйся, Радосте наша, избави нас от всякия нужды и печали.

### **Кондак 4**

Треволнениями житейскими обуреваемии и соблазны греховными соодолеваемии, смиреннии и грешнии раби Твои, под Твой милостивый покров прибегающе, яко в тихое и безмолвное пристанище, прилежно молим Тя: пролей невидимо живительную благодать Твою в души наша и умиротвори удрученная сердца наша, до чистым умом и нескверными устами вопием всегда: Аллилуиа.

### **Икос 4**

Слышав царь Лев греческий, яко чудес великое множество и благодеяния неисчетная исходят от иконы Богоматерни, якоже во Иерусалиме, восхоте имети ю во стране своей, и егда принесена

бысть во святыи Царьград, источи великия чудеса. Люди же видевши таковую милость к ним Божию, в несказанной радости зываху к Благословенней:

Радуйся, Прерадованная, страну нашу осенившая твоим пришествием;

Радуйся, благодатная Дево, христианом всех стран сердобольная Мати.

Радуйся, яко от всякой души христианской всяко прошение приемлещи;

Радуйся, яко вси гласы, призывающая Тя, отсюду во вселенной слышиши.

Радуйся, яко покровом Твоим весь род христианский покрываеши;

Радуйся, яко благодать Твою и милости Твоя на всех ближних и дальних простираеши.

Радуйся, яко всем вся благая в жизни сей подаеши милостиво;

Радуйся, Радосте наша, избави нас от всякия нужды и печали.

#### **Кондак 5**

Взирая на образ Твой и чужая близость Твою к чадам Твоим, вси искупленнии кровию Сына Твоего спешно текут к Тебе, поведая кийждо нужды своя и потребности. Овии убо молят Тя утолити скорби их душевныя и телесныя, инии же в начало путей своих благословение и благопоспешество в делех своих прияти от Тебе чают, друзии мира семейного, согласия и любви даровати им просят. Угнетаеми же от злых человек защиты и покрова у Тебе ищут, и вся сия приемлюще, радостно вопиют: Аллилуиа.

#### **Икос 5**

Видеша людие страны греческия, яко икона Твоя не токмо пучина чудес и неисчерпаемый источник им бысть, но и мощное одоление на супостатов, многажды изношаху ю пред полчища врагия, и тии бяху побеждаеми и разбегахуся, такожде и скифов до конца победы. Людие же благочестивии видевши сие, в радостном трепете восклицаху:

Радуйся, взбранная Воеводо, враги побеждающая;

Радуйся, яко безоружным нам на всеоружных победу подаеши.

Радуйся, ужас и устрашение на неверных иконою Твоею наводящая;

Радуйся, непобедимая Воеводо ратий христианских в брани на врагов.

Радуйся, иконою Твоею, яко стеною нерушимою, люди Твоя ограждающая;

Радуйся, от бед, всяких зол и напастей многообразных нас спасающая.

Радуйся, яко и бесноватии пред иконою Твоею от демонского удручения свободяются;

Радуйся, Радосте наша, избави нас от всякия нужды и печали.

#### **Кондак 6**

Проповедницы богоноснии, святии апостоли, обстояще пречистый образ Твой, прославляют Тя, всех Царицу и Владычицу, и от Тебе рождшемуся Христу Богу нашему вкупе с вои святых мучеников, невидимых сподвижников Твоих в деле ратном, непрестанно вопиют: Аллилуиа.

#### **Икос 6**

Возсия пречудная икона Матери Божия и всей земли русской, егда могучий князь русский Владимир, с великою ратью, вниде в пределы греческия, но не хотя пролития крови христианской, точию же грехи своя омыти святым крещением, прият веру Православную, греческую, и вси спутницы его. Тогда дадеся ему оная святая икона Иерусалимская, дар безценен, и принесе ю в стольный град свой Киев. Людие же россиястии, светом Христовым просвещеннии, Царице Небесной во умилении зываху:

Радуйся, Честнейшая херувим и Превосходящая без сравнения вся небесныя силы;

Радуйся, горе превознесенная и долу смиренно живущым человеком всегда радушно внемлющая.

Радуйся, всем хотящая спастися, к нам иконою Твоею спасти нас пришла еси;

Радуйся, яко нас во тме греховней сидящих на Своя всемошныя попечения и материнския заботы прияла еси.

Радуйся, светом Божественным от иконы Твоея всех нас просвещающая;

Радуйся, ко Христу Бога всех нас приводящая.

Радуйся, райския двери всем нам отверзающая;

Радуйся, Радосте наша, избави нас от всякия нужды и печали.

#### **Кондак 7**

Вседушно восхотев привлещи ко Христу вся люди, сущии в державе Его, и вся отдаленныя концы земли русской просветити светом истинного боговедения, благоверный князь Владимир повеле, святую икону Иерусалимскую перенести из града Киева в великий Новгород, и бе тамо икона сия лета многа, донележе принесена бысть в град Москву, да источает чудеса в сердце России и в пределах московских, и оттоле люди православнии милостей и благодати Богоматери исполненнии, хвалебную песнь Богу воспевают: Аллилуиа.

#### **Икос 7**

Удивил еси на нас милости Твоя, Господи, умножив чудотворныя иконы Пречистыя Твоея Матери в отечествии нашем, ихже яко звезды небесныя разсеял еси по всему лицу земли русской, подавая чрез них великия и неисчислимые благодеяния благочестивым насельником Ея. Темже благоговяя пред величеством славы Твоея и преклоняя колена сердца пред Пречистым образом Препоблагославленной Матери Твоей, умильно вопием Ей:

Радуйся, Владычице, страну российскую в жребий и достояние Себе избравшая;

Радуйся, окрестность нашу тако возлюбившая.

Радуйся, икону Твою чудодейственную в наследие

неоцененное нам от лет древних даровавшая;

Радуйся, яко сею иконою обтекаая грады и веси, аки облаком, благодатию и милостию всех покрываеши.

Радуйся, яко принесением иконы Твоя всяко место освящается и люди обновляются;

Радуйся, яко от иконы Твоя источники чудес всюду источаются.

Радуйся, яко и мы, грешнии, избавляемся от бед и напастей чрез Твою святую икону;

Радуйся, Радосте наша, избави нас от всякия нужды и печали.

### **Кондак 8**

Странно есть уму человеческому, но дивно сердцу верующему, еже како совершился явление сея иконы Богоматери, како от доски сухия, на нейже изображен бьяше лик Твой Пречистый, паче естественная начаша совершатися, сила бо многа от иконы Твоя исходяща, долгонедужным и расслабленным стягнув исцели, вси же видевшие чудеса сии, в Божественном восторге вкупе с исцелевшими, радостно восклицаху хвалу Богу: Аллилуиа.

### **Икос 8**

Ко всем сострадание имущи и всем благотворя чтущим Тя, благоволила еси прославити икону Твою в день лют чумной смертности, вонже страхом велиим сердца всех одержими бяху. Темже вси в покаянии тогда приходившии и умиленно молившиися Тебе во храме Твоем и в домах своих принесенней убо бывшей к ним сей иконе Твоей, внезапной смерти избегаху, и в радостном трепете взываху Тебе благодарственная пения таковая:

Радуйся, теплая о нас ходатаице пред милосердым Богом;

Радуйся, яко Твоими Матерними молитвами гнев Божий на нас утоляется.

Радуйся, яко Тобою кающимся грешником прощение подается;

Радуйся, обращающая на путь истинный закоснелых грешников.

Радуйся, гордых склоняющая к смирению и жестокосердых приводящая во умиление;

Радуйся, в грозный день гнева Божия Материнскую любовь и крайнее снисхождение нам являющая.

Радуйся, Радосте наша, избави нас от всякия нужды и печали.

### **Кондак 9**

Вся окрестность наша под осенением честных иконы Твоя пребывающая и сильным предстательством Твоим хранима, непрестанно молим Тя, благую Матерь, да сохраниши всем нам мир и тишину, да избавиши нас от волнений и смут, от крамол и междоусобных браней, и от всяких смертоносных язв, да вси в благочестии пребывающе, в тихом и безмолвном житии благодушно хвалу Богу воспевают: Аллилуиа.

### **Икос 9**

Кий мудрец возможет изглаголати силу благодати, Тобою

иконе сей дарованную, кая ли песнь сладкопевца достойна будет восхвалити вся чудеса Твоя, яко принесением иконы Твоея во всяко место благодеяния различны источаются: идеже жар, засуха, тамо дожди обильны проливаются, а идеже пагубное безведрие, тамо солнце возсияет, но и поветрия зловредны изменяются, человецы же Тобою тако помилованнии и облагодетельствованнии из глубины души взывают Ти:

Радуйся, пренепорочная Юница, крайним смирением Твоим небеса долу приклонившая к схождению в Тя Сына Божия;

Радуйся, Царице небеси и земли, ейже суша и море повинуются.

Радуйся, Владычице, яко Тобою дожди благовременны и благорастворения воздуха нам ниспосылаются;

Радуйся, теплая Предстательнице наша, пагубныя удары грома и молнии от нас отводящая.

Радуйся, яко огонь, поядающий дома и пажити людския, росую молитв Твоих угашающая;

Радуйся, яко принесением сея иконы Твоея заразы смертныя люди избегают.

Радуйся, Радосте наша, избави нас от всякия нужды и печали.

#### **Кондак 10**

Спасительное пристанище верным среди бурь и волнений моря житейскаго, показующее всем нам добрый путь ко пристанищу вечному небесному, помоги нам беспорочно пройти путь жизни сей временней, соверши нас во всякой добродетели и соблюди всех в чистоте и святости, приведи нас в блаженное царствие Сына Твоего, да и мы Тобою спасеннии, возможем тамо со ангелы и лики святых вечно воспевати хвалебную песнь: Аллилуиа.

#### **Икос 10**

Непреложно веруем, Владычице, яко невидимым Твоим предстательством, аки стеною крепкою, ограждаеши всех нас от искушений и бед, и всяких злокозненных действий врагов наших видимых и невидимых. Сего ради со слезами вопием Ти:

Радуйся, Хранительнице наша, от злобы бесовской невидимо нас ограждающая;

Радуйся, зависть и коварство на нас злых человек премудро разрушающая.

Радуйся, на всех стезях жизни наша милостиво нас оберегающая;

Радуйся, вся наша мысли от злых приражений и суетных мечтаний бдительно охраняющая.

Радуйся, вся наша желания во благо и спасение всегда направляющая;

Радуйся, яко добро точию творити во славу Божию тайно нас наставляющая.

Радуйся, Жизневодительнице наша, к небесам нас во блаженное отечество руководящая;

Радуйся, Радосте наша, избави нас от всякия нужды и печали.

#### **Кондак 11**

Пение хвалебное немолчно воспеваем Ти, Богородительнице, яко молитвами Твоими к Сыну Твоему и Богу нашему, грады и веси от злых обстояний сохраняеши, мир и изобилие и вся благая в жизни всем чтущым Тя подаеши, всяк возраст на путь спасения наставляеши, и всех вразумляеши воспевати милосердому Человеколюбцу Богу: Аллилуиа.

### **Икос 11**

Божественным светом пречистой души Твоей всю вселенную просвещаешь и сею иконою Твоею сердца всех веселия и радости исполняеши, благодать ея всюду вносящи. Сего ради и стари и млади, и юницы и дети, в чувствах глубочайшаго благоговения согласно Тебе зовут:

Радуйся, людям престарелым отраду утешение в сердца их проливающая;

Радуйся, яко младенцем благое воспитание и преуспеяние разума к восприятию полезных учений подаеши.

Радуйся, юных наставляющая целомудрию, в девственной чистоте души их соблюдающая;

Радуйся, благословенное совершение христианских супружеств.

Радуйся, добрым земледельцем плодородие у Бога испрашивающая;

Радуйся, Тя призывающим путником и по морю плавающим милостиво спутствующая.

Радуйся, Радосте наша, избави нас от всякия нужды и печали.

### **Кондак 12**

Благодать велия дана Ти есть от Бога, Препоблагословенная Мати Божия, еже убогия назирати, болящия исцеляти, такожде помогати бедствующим, утешати скорбящим и всех заблуждающихся на путь спасения обращати. Темже вси труждающиеся и обремененнии имея в Тебе благую Матерь, и чрез Тебе неизлагоданныя милости приемлюще, умильно вопиют: Аллилуиа.

### **Икос 12**

Поюще чудеса Твоя, Богородительнице, имиже являеши нам многую любовь Твою и милосердие, восхваляем чудодейственную силу Твою, всемогущая Владычице наша, и предстояще Пречистому образу Твоему, молим Тя: утоли наша печали и избави нас от всякаго зла, да всегда молитвами Твоими в любви Твоей пребывающе, во умилении сердечном зовем Ти:

Радуйся, всем скорбящим и обремененным приносящая утешение и радость;

Радуйся, Скоропослушнице наша, сущым нам в бедах и напастех, быстрю помощь посылающая.

Радуйся, в болезнях призывающим Тя целебую силу Твою и скорое выздоровление подающая;

Радуйся, всепрощающую любовь Твою на место гнева и ненависти всюду вводящая и ожесточенно враждующих примиряющая.

Радуйся, незримая Воспитательнице малых сирот и бездомным вдовицам неизменная Покровительнице;

Радуйся, единая наша надежда, отрада и утешение в томительный час смерти.

Радуйся, теплая и по смерти нашей Ходатаица о нас грешных у престола Всевышнего;

Радуйся, Радосте наша, избави нас от всякия нужды и печали.

### **Кондак 13**

О, Всепетая Мати, Царица небесная, рождающая Христа Сына Божия и Спасителя миру всему. Приими ныне от всего сердца нашего сие приносимое Тебе моление и всесильным Твоим предстательством сохрани нас от всяких бед и напастей в жизни сей, и сподоби нас в блаженстве вечном со всеми святыми хвалу Богу воспевати: Аллилуиа.

**Этот кондак читается трижды, затем икос 1-й и кондак 1-й**

### **Молитва к Пресвятой Богородице перед Ея иконой, именуемой "Иерусалимская"**

О Пресвятая и Преподобная Мати Господа и Спаса нашего Иисуса Христа Пречистая Приснодево Богородице Марие, Покровительнице и Заступнице наша! Припадаем и поклоняемся Тебе пред святою и чудотворною Иерусалимскою иконою и смиренно молимся Тебе, вонми гласу молитв наших от души приносимых Ти, виждь скорби и искушения наша, и яко воистинну любвеобильная Мать потщися помощи нам беспомощным, унылым, во многая грехи впадающим и присно прогневающим Господа и Создателя нашего. Егоже умоли, Владычице, да не погубит нас со беззаконии нашими, но ради Твоего предстательства явит нам человеколюбную Свою милость, испроси нам, Всеблагая, здравие душевное и телесное, покаяние во гресех совершенное, преспеяние в добродетелех христианских, благодатное, мирное и благочестное житие, земли плодоносие, воздуха благоухание, дожди благовременны и благословение свыше на вся благая дела и начинания наша. Сохрани и соблюди ны в мире и благоустроении, и споспеши всем нести иго Христово благое и легкое в терпении и смирении, во спасение душ наших, ограждая нас Матерним покровом Твоим от искушений диавольских и всякого зла. О, Царице Всепетая, Мати Божия всеблагая! Прости богоноснии руке Твои на умоление к возлюбленному Сыну Твоему, Господу нашему Иисусу Христу и приемь сомолитвенники к Нему, вкупе с Тобою на иконе Твоей изображенная, праведныя родители Твоя, Иоакима и Анну, с ними умоли Его помиловати нас и избавити от погибели вечныя, и якоже иногда в скорби велицей пред сею иконою Твоею молившемуся Нилу утешение и обетование благое даровала еси, тако и ныне нас смиренных и грешных молящихся, услыши и яви нам великия Твоя щедроты: болящий исцели, скорбящия утеши, бедствующия от бед избави, путешествующия и мореплавающия невредими сохрани, и вся ны сподоби благочестно житие наше земное скончати, благодатную христианскую кончину получитьи, Святым Тайн причастницы быти, и небесное царствие унаследовати: да во свете и радости святых поем и величаем милосердие Твое и Рождающегося от Тебе Господа нашего Иисуса Христа. Ему же со безначальным его Отцом и Пресвятым Духом подобает всякая слава, честь и поклонение, во веки веков. Аминь.



**Тропарь Пресвятей Богородице в честь иконы Ея, именуемой  
«Иерусалимская»**

**Тропарь, глас 4:**

Богорадованная Владычице, препрославленная Мати щедрот и человеколюбия, всемилостивая о всем мире Ходатаице, прилежно раби Твои ко Твоему предстательству прибегаем, и ко пречудному образу Твоему со умилением, припадающе, молимся: молитву теплую Сыну Твоему и Богу нашему сотвори, о Всепетая Царице Богородице, да от всяких болезней и печалей нас Тебе ради избавит, и от грехов всяких свободив, Царствия Своего Небеснаго наследники ны покажет: велие бо и неизреченное яко Мати к Нему дерзновение имаши и вся от Него испросити можеш, едина во веки преблагословенная.

**Тропарь, глас 3:**

Твоего предстательства уверение и милосердия Твоего явление икона Иерусалимская нам, Владычице, показася, пред неюже души наша в молитве изливаем и верою Тебе вопием: возри, Милосердая, на люди Твоя, вся скорби наша и печали утоли, утешение благое в сердца наша низпосли и спасение вечное душам нашим, Пречистая, испроси.

**Кондак, глас 5:**

Не отрини, о Милосердая Мати, слез и воздыханий наших, но прошения наша милостивно приемши, пред Иерусалимскою иконою Твоею молящихся людей веру укрепи, умилением сердца их исполни и крест земнаго жития нести им помози, елика бо хочещи, можещи.

**Величание**

Величаем Тя, Пресвятая Дево, Богоизбранная Отроковице, и чтим образ Твой святой, имже точиши исцеления всем с верою притекающим.

[Празднование 12/25 октября](#)

[Иерусалимская икона Божией Матери](#)